

Službene novine Federacije BiH, broj 96/22

Na osnovu člana 102. stav (1) i člana 112. stav (2) Zakona o zaštiti okoliša ("Službene novine Federacije BiH", broj 15/21), Federalno ministarstvo okoliša i turizma donosi

PRAVILNIK

O IZMJENAMA I DOPUNAMA PRAVILNIKA O POGONIMA, POSTROJENJIMA I SKLADIŠTIMA U KOJIMA SU PRISUTNE OPASNE SUPSTANCE KOJE MOGU DOVESTI DO NESREĆA VEĆIH RAZMJERA

Član 1.

U Pravilniku o pogonima, postrojenjima i skladištima u kojima su prisutne opasne supstance koje mogu dovesti do nesreća većih razmjera ("Službene novine Federacije BiH", broj 15/21) (u daljem tekstu: Pravilnik) u članu 11. stav (1) dodaje se tačka a) koja glasi: "U izvještaju o stanju sigurnosti moraju biti imenovani stručnjaci, odnosno navedeno ime, prezime, stručno zvanje i svojeručni potpis osoba koje su učestvovala u njegovoj izradi."

Dosadašnje tač. a) i b) postaju tač. b) i c).

Član 2.

Iza člana 15. dodaju se novi članovi 15a. i 15.b. koji glase:

Član 15a. (Stručna komisija)

(1) Stručna komisija formira se u cilju ocjene dokumentacije koja je neophodna za izradu Spoljašnjeg plana intervencije iz člana 15. ovog Pravilnika.

(2) Ministar rješenjem imenuje stručnu komisiju koja se sastoji od najmanje 3 (tri) člana sa liste stručnjaka.

(3) Voditelj upravnog postupka predlaže članove stručne komisije za svaki konkretan projekat ili postrojenje u radu.

(4) Članovi stručne komisije ne mogu biti lica koja su:

a) učestvovala u izradi dokumenata iz stava (1) ovog člana, koji su predmet ocjene;

b) bračni drugovi, krvni srodnici do četvrtog stepena srodstva i srodnici po tazbini ili su zaposleni kod pravnog lica koji je izradio navedena dokumenta;

c) osnivači ili zaposleni kod podnosioca zahtjeva za ocjenu dokumenata iz stava (1) ovog člana do drugog stepena srodstva lica navedenih u tač. a) i b) ovog člana;

d) lica zaposlena kao inspektori, odnosno lica koja vrše inspekcijski nadzor nad projektom ili izgrađenim postrojenjem za koji se izrađuju dokumenta iz stava (1) ovog člana.

(5) Dokaz da lice ispunjava uslov iz stava (5) tač. a) ovog člana jeste pismena izjava da nije učestvovao u izradi Plana sprečavanja nesreća većih razmjera/Izvještaja o stanju sigurnosti, Informacije o sigurnosnim mjerama i Unutrašnjeg plana intervencija koja mora biti ovjerena kod općinskog nadležnog organa.

(6) Voditelj postupka obavještava stručnjake iz stava (1) ovog člana o prijedlogu za rad u stručnoj komisiji i dostavlja ministru obrazloženje izbora stručnjaka za člana stručne komisije.

(7) Izvještaj svakog člana stručne komisije za ocjenu dokumentacije iz člana 15. ovog Pravilnika, pojedinačno mora sadržavati i jasan zaključak da li se dokumentacija prihvata uz jasno obrazloženje donesenog zaključka. Izvještaj obavezno sadrži datum kad je sačinjen i potpis člana komisije.

(8) Način rada stručne komisije uredit će se Poslovníkom o radu koji donosi Federalno ministarstvo okoliša i turizma.

Član 15b.

(Naknada za rad članova stručne komisije)

(1) Ministar posebnim Zaključkom utvrđuje broj norma dana, iznos naknade za rad stručne komisije za ocjenu dokumenata neophodnih za izradu Spoljašnjeg plana intervencije iz člana 15. ovog Pravilnika u zavisnosti od složenosti posla.

(2) Naknada iz stava (1) ovog člana obuhvata nadoknadu za rad stručnjaka iz Ministarstva i spoljašnjih stručnjaka, troškove prevoza, dnevnica i smještaja, te troškove kopiranja i distribuciju dokumentacije neophodne za izradu Spoljašnjeg plana intervencije iz člana 15. ovog Pravilnika i druge troškove.

(3) Naknada za rad stručnjaka iznosi 15% prosječne mjesečne neto plate ostvarene na nivou Federacije Bosne i Hercegovine za posljednje tromjesečje za jedan norma - dan rada na ocjeni dokumentacije po pojedincu.

(4) Podnosilac zahtjeva za ocjenu dokumentacije neophodne za izradu Spoljašnjeg plana intervencije iz člana 15. ovog Pravilnika je dužan uplatiti ukupan iznos naknade iz stava (3) ovog člana u roku od sedam dana od dana dostavljanja Zaključka o visini naknade za rad stručne komisije uplatom u korist Budžeta - Federacije BiH - Podračun Ministarstva.

Član 3.
(Stupanje na snagu)

Ovaj pravilnik stupa na snagu narednog dana od dana objavljivanja u "Službenim novinama Federacije BiH".

Broj 05-02-19-236-1/21-1
23. novembra 2022. godine
Sarajevo

Federalna ministrica
Dr. **Edita Đapo**, s